

四明叢書

張宗祥



存悔集

四明張氏約園開雕

序

存悔集者何范冬齋詩也集何以存悔名冬齋曰震无

咎存乎悔因此補過也蔣檣庵傳盧配京錦因及冬齋

曰冬齋少負才不羈謝山力挫折之始翻然從事於根

柢之學名其集者所以志悔也謝山高第弟子曰盧配

京曰蔣檣庵學備曰張望槎嗣曰李雪坪立櫃曰董小

鈍秉純合冬齋而六所謂許可者不過五六人者是也

見李立小鈍最後死而冬齋實先亡誌冬齋墓者謝山

槩傳也謝山之哀冬齋哀其年也豈獨哀其年哀其失傳人

也謝山曰學統之分合經術之醇漓史案之異同文章之盛衰正變無不了了配京精悍冲一冬齋又字冲一濟之以縝密嗜學之深罕有足與二人抗手者自黎洲輯宋元學案謝山增補之及門弟子羣襄厥事而尤得助於冬齋故檇庵傳冬齋曰留心學案窮年兀兀蓋謂此也天不假年僅僅以詩傳而所爲詩謝山又謂其有敗葦枯楊之感今讀其詩誠哉悲音也然如有懷一作有云大節陶貞兼庾孝母儀歐教更班箴自註云先曾伯祖驚伯先生故國諸生不仕順治戊戌以孝行旌先祖母楊

氏乾隆辛酉欽旌節孝二十初度詩云孝友一門堪特

傳冰霜六載教孤兒自註與前略同然則冬齋之詩詩

史也

攷甬上望族表西湖范氏洪震一望案洪震字驚伯一作驚百續甬上耆舊傳孝子億子億父客死

於贛母楊氏撫之走數千里不見父遺骸孝子復生孝子驚伯行誼酷肖乃父與弟洪星洪宿鄉黨稱爲三友康熙己未城西火烈獨其門無恙謝山紀驚伯遺事更言管江杜秀才懋俊死節其孤以與陸處士宇爆買藥過孝子因爲之窆其三喪置墓田並助之娶焉驚伯之孫廷謀嘗註杜詩直解三卷又作杜工部年譜一卷雍正戊申刻之

於稼石堂冬齋以貞孝之裔淵源家學今存其詩存

其人存其學存其家世也詩何以得存謝山手選也手

選之本藏之者配京之孫卓人也

卓人名杰四明談助道光丁未夏日卓人

於故紙中檢得存悔集

卓人藏之六十年見之者陳氏餘山也序之者張氏鐵峯也梓之者卓人也攜之以示余者馮孟顓也陳氏之詩誦羣經質張氏之漢書讀三種壽鏞旣先後刻之茲更重刻斯集獨惜天能不火孝子之門而不能永冬齋之壽然天雖不永壽而有此二百篇之存則亦不終爲壽奪也民國二十四年十一月後學張壽鏞序

序

冬齋范冲一先生鵬與月船廬先生鎬同遊謝山全太
史之門兩人道相合氣相投也顧月船學與年進以名
孝廉官平陽學博而冬齋不得志於時年未及壯而遽
卒月船收其遺詩謝山誌其墓以爲王達原之流去今
纔百餘年而今人士已無知有冬齋其人者而況自茲
以後乎雖然士之得聞於世以著述名也謝山門下之
精文藝者尙有蔣樗菴學鏞董小鈍秉純張望槎炳李
雪坪立櫃諸先輩蔣董皆有著錄張通毛詩李尤邃於

經著病枕草率皆散佚惟冬齋存悔集幸而獨存曩與
陳漁山姊壻過月船之孫卓人孝廉家檢取其集讀之
點綴皆謝山手蹟選定二百餘首稱於茶山紫薇止齋
爲近而又勉其葆護愛惜不宜並於病鷗寒鵠之音鳴
呼冬齋之自促其生抑亦有由矣漁山屬卓人什襲珍
藏俟諸異日踵謝山續耆舊之後備列一家回溯是語
忽忽二十餘年今年夏卓人袖其遺集謂余曰余守是
稿六十年近十餘年來屢值播遷其不毀於燬火牛篋
者倖爾今老矣漁山又以道阻不得歸此時不謀剞劂

安知不終歸散佚其於先祖收藏之意云何子爲我序
其端而付之梓卽余願慰矣余案櫝菴存稿八卷黃東
井先生刻於嘉慶癸酉小鈍文集藏於家其百花吟刻
於拜梅山房月船詩稿初亦東井先生刻之粵東卓人
近擬刊爲大帙獨念余於先世兩代詩未及登板而卓
人旣欲重刻其祖之遺稿又復遠追世誼並取先人之
所藏出以行世謂是淵源一脈所推不可聽其淹沒前
輩筆墨自是得以並傳是則余之所重媿也夫咸豐七
年四月後學張恕謹序

范冲一穿中柱文

冲一生而慧年十五補諸生願自視甚高於世人無當其意者其初來見也予頗思所以裁量之冲一知予意遽折節益矢力於古學良久屬其友致意於予若惟恐不相梯接者予急延之則其學已大進而容貌辭氣退然無復前者之比自是昕夕至予家相討論甬上師友源流自昔甲於吳越年來耆老凋喪無復高曾之規矩經史溝澮俱成斷港閒有習爲聲韻者不過街談巷語之伎倆其中索然無有而妄相夸大其餘則捧場屋之

文爲鴻寶展轉相師一望茅葦封己自足要皆原伯魯
家子弟也沖一求友於里中城東小江里盧生配京長
於沖一七八歲其資器相伯仲二人相與淬厲得一書
則更迭讀之閒有所疑則折衷於予學統之分合經術
之醇漓史案之異同文章之盛衰正變無不了了配京
精悍沖一濟之以縝密皆五行並下一日可盡數卷里
中之書不足供其漁獵則請予借書於淮東馬氏小玲
瓏山館浙西趙氏小山堂窮年兀兀以予所見通家子
弟甬上最乏材若江淮後起之秀不少奇特然嗜學之

深罕有足與二人抗手者方私心竊喜以爲甬上先正
實佑啓之以振粉社之積衰卽予之老病荒落亦或得
乞靈焉以邀將伯之助而豈意冲一年甫二十有三一
病而死惟予素有憂於冲一者以冲一之年當出水芙蓉
葉耳而其所爲詩時時有敗葦枯楊之感予切戒之曰
是不祥之徵也當痛改之冲一善予言而不能自克閒
嘗科形而坐視其髮種種然禿翁也益危之不謂其竟
不及五稔也今年之春翠華南幸予力疾迎於吳下冲
一亦至杭見予喀血之厲也愀然曰方今東南久獻之

寄在先生而比年學稍就衰願深自調護勿過勞以傷
生時杭堇浦方以漢書疏證令予覆審沖一每見予之
所論定以爲在劉原父吳斗南之上及送駕於吳下沖
一別予河干黯然東返嗚呼沖一方憂予之死而反以
身後之文累予河干握手遂成永訣祝予之嗟能無長
痛古人之負高才而不壽者多矣以沖一較之其殆王
逢原之流亞邢敦夫輩未能逮也王邢雖天幸賴有力
者之口以傳沖一之死誰其傳之者沖一篤於友朋之
誼殷勤急難不惜竭力以濟人天假之年豈非有用之

才子自邗上歸過哭之其父哭於堂其母哭於戶內慘然欲絕而配京亦流涕向予有隻輪孤翼之懼嗚呼孰謂斯人短折若此沖一姓范氏名鵬一字冬齋世爲鄞之白檀里人五世祖意暨曾伯祖洪震皆以孝子旌曾祖洪某祖佩某父章甫諸生娶孫氏先沖一卒無子以再從子承明爲後生於某年月日卒於某年月日葬於某鄉之某原沖一從予求樓宣獻公集開慶四明志暨宛溪讀史方輿紀要諸書者久矣今年始從小玲瓏山館攜致之而沖一已卒令配京陳書襯前以醉之更爲

之銘其幽其詞曰

二惠競爽差慰寂寥又弱一个令我魂銷念茲草堂君
所橫經歲晏歸來無君履聲將行萬里出門折軸豈祇
雙親爲君痛哭全祖望撰

存悔集目序

乙丑歲余年十七始學爲詩寄懷託興信口而出非有風雅淵源也積至庚午得詩若干首合爲一卷名之曰存悔集聖訓有之言寡尤行寡悔三代而下人多不肖世之尤我其又何論夫言者心之聲也行事之實也詩雖不工愁病之餘性情行事大略可考人苦不自知事後始見他日展卷必將有翻然悔於吾心者易曰震无咎者存乎悔因此補過以修其身焉庶幾不遠之復也夫庚午剛反後一日冬齋主人鵬書